

Мавлиди шариф марҳабо



15:38 / 06.09.2024 4038

Қуёш порлаб чиқди гўё Бани Ҳошим бошидан,
Бир марҳамат келди Раҳмондин аларнинг қошида.
Олам ғарқ бўлмоқ узра турарди қизлар ёшидан,
Икки олам раҳмати мушфиқ Расулим марҳабо.

Онани қул айлабон ҳор айлар эрди бул қавм,
Аларга кор қилмас эрди одам айтган бир қавл,
Разолат ботқоғи узра ғарқ эдилар шул зайл,
Икки олам раҳмати мушфиқ Расулим марҳабо.

Нур тоғида чарҳ урарди беадад хур малаклар,
Олам аҳли Холиқидин тилар эрди тилаклар,
Ҳапқирарди ваҳий келган онида бу юраклар,
Икки олам раҳмати мушфиқ Расулим марҳабо.

Амин эрди номи поки азалдин ул Зотни,
Аҳмад дея зикр қилмиш Набийлар ҳам отини,
Муҳаммад деб атамиш Мутталиб об-ҳаётни,
Икки олам раҳмати мушфиқ Расулим марҳабо.

Ул куни олам аро шамс барқ этарди дам-бадам,
Фақиру мискин учун келди бу кун олий карам,
Етимлар оҳи само тоқига қўйганда қадам,
Икки олам раҳмати мушфиқ Расулим марҳабо.

Лоту-Уззо зирқирарди номи айтилган замон,
Лол эди мушрик қавм нозил ўлмишдин батамом,
Не демоқни билмас эрди Абу Жаҳлҳам ҳамон,
Икки олам раҳмати мушфиқ Расулим марҳабо.

Баҳри меҳридин Билоллар маст эдилар бе адад,
Бир дуо бирла Умарлар динига бўлди мадад,
Бакрлар иймонини ўлчашга етмасди ҳудуд,
Икки олам раҳмати мушфиқ Расулим марҳабо.

Заминга раҳмат ёғарди фалаклардин бе тиним,
Муҳаббат узра фарқ эрди Ясриб аҳлин ҳар они,
Нурлара бурканди уммат аҳлин тим-қаро тунни,
Икки олам раҳмати мушфиқ Расулим марҳабо.

Тоғу-тош мадҳ этмиш отин Илоҳимнинг ёри деб,
Инсу-жин этироф этмиш Набийлар Мухтори деб,
Ансор аҳли ҳайқирар, фидо бўлсин жон бори деб,
Икки олам раҳмати мушфиқ Расулим марҳабо.

Отаю-онам сиза фидо айларам ёри Ҳақ,
Умматим деб жони баҳшиш айлаган эй бори Ҳақ,
Итоат этмоқла этгаймиз фаҳр, ҳар кори Ҳақ.
Икки олам раҳмати мушфиқ Расулим марҳабо.

Ҳисобот кун бўлса гар, жавдирар кўзлар ҳасрато,
Бу уммат дардига дармон илоҳий бир раҳмато,
Шафоат баҳридин Умидга ҳам айлангиз ато,
Икки олам раҳмати мушфиқ Расулим марҳабо.

Аллоҳумма солли васаллим ва барик алайҳ.

